


CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
MAY 5 1941

2

75417/4224



斛山楊先生遺稿卷之二

祭文

祭原方畦先生文

先生蚤棄軒冕樂道力田視不義之富貴如浮雲之漠然  
惟欲窮討古今之典籍以擴充其未盡之天踐履方正  
宵次高遠其超乎塵外也如鳳凰之高逝必千仞而翔其確  
乎不拔也如松柏之挺翠貫四運以獨芳慨君子之存歿  
爲人世之否臧何皇天之慙遺俾遠邇其感傷爵祿爲知  
友聞訃奔走心懷永悼匪言可盡敬陳薄奠先生享之

哈佛大學藏印

祭次女文

嘉靖二十二年三月初一日父在獄中以書告石氏女子秋之墓曰嗚呼痛哉女子秋汝有知乎其聽父三千里外哭汝之言去年三月某日汝偲兄到京以書告我言汝疾病秋九月汝休兄復告汝病日深吾見其詞語悽愴若有隱不盡告之意今年二月內仕自家鄉來吾以書問汝存歿且言當以實告休等始言壬寅歲夏四月十五日丑時分汝以疾終於汝家是時偲仕皆在京師休與汝母共送輜車葬汝於盤月村之南嗚呼子秋汝果死矣不知是何等

病乃即死也吾數汝死期在吾下獄一年零二月之後將無以吾得罪之深惶懼不寧即成病以死乎果若此吾心不能不汝咎也吾觀古今以來為人臣者豈無狂愚妄論時政身陷罪戾如我今日者乎為其女子者或有天性仁孝篤於愛親而不解於心者豈皆憂戚成病淹焉莫救以殞其生乎嗚呼痛哉子秋汝何至於斯也汝何至於斯也吾尚記汝童稚時吾教之使讀孝經論語及文訓諸篇汝又數向予索讀烈女傳吾見性資聰敏多能曉悟但過於剛烈不能含容忍耐以成中和之德此等氣象與汝父絕

相類也。汝父罪難悠悠，自分宜死死而蒙恩歸葬故里，吾欲汝姊妹兄弟懸棺而窆，封以馬鬣，樹以荆梓，共成一哭。從此朝夕朔望，再勿流涕，豈意汝即早死，使吾於囚繫顛危中，反哭汝痛，汝弗能已耶。嗚呼！子秋，犴門深鎖，今已三年。汝父一念白日青天，忽聞汝死，雙淚漣漣，西望茫茫，未得洒汝墓前，念之窮極，一至斯焉。乃十九年庚子歲秋，予始北行，汝與汝姊送我中庭，視我漸遠，顧瞻徘徊，容顏戚慘，兩淚盈腮。汝父不德，天毒降災，乃汝姊妹淪胥，以摧二三年間，黃土兩堆，我心匪石，胡不痛哀。今吾寫此，傷悼之情，命汝休兄以家釀一盞麥飯，一盂歸告汝靈。父若得荷主上再生之恩，歸來有期，念汝長逝，心抱無涯之悲，即於汝姊汝墓次第哭之。嗚呼！子秋，汝來顧此。

雜著

香灰解

予復下獄半載，為丙午年三月初七日晨旦，東廠使邏者來覘，即予卧側，以殘甑藉囚板上，相與偶坐者久之。獄中穢氣鬱蒸，久在內者，習不自知。從外乍進，則臭不可堪。乃以棒香一莖，插坐前，甑縫中焚之，須臾香盡，灰不散，宛如

一完香焉予取而懸諸壁上至第五日猶未散因思其故  
為作解以散之夫是物也其將中抱憾積憤凝滯於此而  
有不釋然耶抑焚猶未焚而托此以為永久耶二者雖有  
間焉而其精誠感致則一也遭世乖變人定勝天即一物  
之微而其用之所措固有幸不幸焉耳蓋賓筵廣設幄錦  
幃羅庖翟薦德恪舉殊儀叶五和切音哦上肅環冕下列笙歌君臣  
交慶委佩鳴珂旅語之際嘉謀孔多聞善即聽若決江河  
王猷下降枯槁滂沱雍容揖遜永息干戈上安下順宇內  
冲和則唐虞三代之境界也燒異薰以昭明德固已有之

舍彼其處而來焚吾獄中焉此何等氣象也瑾櫛掩戶日  
影不通塵留負鼠隙引汚風一息淹淹百慮忡忡其與吾  
環列而偕坐者不過三五囚徒東西南北偶此相逢或十  
三四齡口尚乳臭之豎子或八九十歲鬚眉皓然之老翁  
身披帶索首冒飛蓬額感氣喪肌削腸空縱蓄百金一動  
即窮荷校滅耳罪彼不聰手梏足械濃白血紅俯就坎窞  
仰叫穹窿使聞之者皺眉見之者戚恫甚至於不能為心  
則閉目掩耳佯為瞽聵爾來焚此可謂擇地擇人之未審  
忽於所入而謬于所從者矣久而不化疑有神明類彼志

士之死不瞑嗚呼其劉忠愍耶抑周蹟山浦竹塘耶不死  
正寢死此福堂名垂不朽同彼霄壤與我國家為龍為光  
雖然陵谷有時而變遷金石亦至於消泐故凡合氣成質  
寓形宇內而為人為物者終歸於盡天地如此其大也古  
今如此其遠也其孰不蕩為灰塵而揚為飄風乎爾其欲  
外消息盈虛之常道觀反復無窮之世變以後天而終乎  
是固無此理也吾為爾摩散之再拜而祝之曰匪人焚爾  
惟爾自焚爾不馨香與物常存煨以烈火騰為烟氲上而  
不下聚而不分直衝霄漢變為竒雲餘香不斷苾苾芬芬

龍逢比干相與為群爾宜自慊胡為云云理無二致吾以  
喻人事苟可死何憚殺身願爾速化歸彼蒼旻樂天委運  
還爾之真拜起悽愴雙淚盈襟嗚呼易化者一時之形難  
化者萬世之心形化而心終不化吾其何時焉與爾乎得  
一相尋也

宋忠簡公像贊

建炎之初皇綱解紐二宗北轅一帝南走寤寐思賢宜不  
敢後而於公忠猷棄如糞土事至於此天實為之於人何  
尤嗟夫使公回鑿北征之䟽得一舉行則仗義揚威經營

四方根本之慮付之李綱將相協力國勢以昌燕雲以北  
我圉我疆天子之守可在四夷而徽欽父子可生反於漠  
荒惜其為群小阻抑懷恨而歿使中原流血宇內分割鬼  
哭神憤莫可救藥相緣相習而多自我伐保養奸諛賊殺  
忠良奔播危促退而渡江遂至帝王統緒閩海一舫焚香  
就溺以告滅亡而為志士仁人所痛傷然則公一身之存  
歿豈特為宋人國步之隆替而實萬世華夷天地之所係  
也

七月七

世傳七月七日天孫出嫁人間女子乘時乞巧唐人柳子  
厚亦有乞巧文嗚呼女子所乞者刺繡中饋之能耳丈夫  
之巧欲何為哉予今日獄中所乞則異於是他人乞巧予  
惟求拙他人乞榮顯予惟以罪自安於困辱焉予素所畜  
者欲退則躬耕畝畝以全微軀進則勞心以利天下此平  
生之志至拙之術也庚子歲以愚拙應徵任職五月食君  
之祿未敢苟安但知為宗廟社稷萬萬年深長之慮而不  
知為子孫身家一日計此非拙之尤甚者乎當是時予之  
拙見謂天下之事吾當拙為之不可為當以拙退之不能



解山遺稿卷一  
退當以拙死之以拙求死不可得而今當以拙坐監故展  
轉凶危苟延殘息於五年而不自悔皆拙之驗也願天孫  
鑒臨下土照我衷曲即我素所欲而未能自盡者以增益  
之使我抱此迂拙終身不易生為拙人死為拙鬼無使我  
忘身狗國之拙或變而為苟生利家之巧焉乙巳年七月  
初七日爵焚香再拜祝

讀易

余既久在罪難中自念君子存仁造次顛沛未嘗少懈歲  
月云邁百年易失頃刻光陰未可以若醉若夢而玩處之

也即卧側障之以簾出手焚香凝神清慮讀易於其間客  
有謂予者曰其名此為安樂窩可乎余應之曰不然也余  
之罪多矣奚以安樂為哉人之處世非安樂則困辱二者  
而已世之人或以富貴為安樂以患難為困辱此固未然  
而謂吾之處困為安樂亦非也夫其所為慊於心而合乎  
義理之中正則雖日在患難此未嘗不安樂也夫其所為  
愧於心而疾乎義理之中正則雖日處富貴而此心未嘗  
不困辱也吾之所為質於古人之作用為何如其愧於四  
聖亦多矣然則名吾所處為困辱窩可也又奚以安樂為

哉、况易之為書、廣大悉備、天地萬物之理具於此、損益困節中孚習坎、則切於處憂患之道也、因銘以自警、銘曰、安樂安樂、由心之作、展轉困辱、惟吾所速、四聖垂訓、炳炳簡編、議之而後動、擬之而後言、或可以觀象玩辭、而補吾之愆、

### 清明

清明節、人以柳絮一枝贈予、予即謝之、以詩、有知君憐我園中久、故送乾坤生意來之句、既而觀之、不覺心曠神怡、動靜坦夷、鬱抑百結之愁腸、忽變而為廓然無涯之宵次矣、

於是喟然嘆曰、天地生生不已之理、仁者渾然同物之心、即此可以默識而旁通之矣、吾意此時、風景清和、百彙亨通、芳隄曲岸之間、賢人君子、携酒賦詩、相與更唱迭和、而賞此柳者、或有之、賢人君子、蓋賞物之得其所也、物之得所、由人之得所也、人物得所、豈易言哉、予乃持以歌之歌、曰、春遲遲兮日融融、飽雨露兮舞東風、感物類兮動吾中、動吾中兮憂邛邛、

### 劉秀才字說

泰和劉秀才名年、字以時、予為之說曰、年統四時、春夏秋

冬不失其序、天之道也。性具四德、仁義禮智、出當其可、入之道也。以人道合天道、惟其時而已。性焉安焉者、謂之聖。復焉執焉者、謂之賢。士希賢、賢希聖、則純乎天矣。吾敢以志此人道、而亶亶不怠者、有望於年焉。

書

與司官書

竊惟執事名臣後裔、儒林節行、自理北司事以來、獄中人盛德之贊、青天之謠、走二人得於耳聞者、亦久且熟矣。往年曾寺丞子如獄中、具道二執事於爵、其垂念曲全之心、

甚為切至、以二人事喻東人云、幹國之臣、當為調解、此皆二執事痛隱時政、懸切國民、而為世道深長之慮之心也。豈特區區為二人惜哉。在二人未嘗不銘刻肺腑、感激思奮、益自砥礪、而求不負賢人君子之許可焉。屢欲修書啓謝、以罪難中多所不便而止。其敢忘此厚德、而忍於自薄也。十月初爵、以事出窮迫、以死自誓、又不欲苟且泯沒、使死無聞焉。思欲具書、以獻

主上、以盡垂歿忠盡之識。其書始終千餘言、大抵援古証今、剖析於義利邪正之幾、懇切於安危存亡之戒。欲

主上納諫容直以成君德以廣君道與唐虞三代兼美比隆  
中間有云臣以罪處獄中四十五月有餘矣延此一息尚  
未死滅此實

陛下好生之德覆載之恩之所及而陶某等於臣飲食一  
節曲為區處不欲置臣於死使朝廷有殺諫臣之名其  
心未必不為忠於

陛下者也此數語者實以古人之作用望為執事之能事  
焉諺云以所重加於所好爵以人臣以道事君者而望二  
執事是以天下古今所同重之道而加之矣其待之可謂

至厚期之可謂至遠矣時以楮筆不便未能稿具君門萬  
里亦無由為九重獻而徒能以口誦耳故嘗數語邏者  
云我有心事願告朝廷汝為我達之所以為此言者以冀  
主上明賜紙筆則頃刻可成稽首以上雖死不恨天啓  
聖衷萬一感悟不惟於國家大政有所裨益而二執事之  
高義美名亦因得以示天下傳後世矣近日獄中嚴戒之  
故走二人亦頗聞其詳矣顧事至於此莫非天命上則  
朝廷之法下則人臣之罪在二人敢不修身以俟而順受  
之乎但身居言路職任諫諍中奮感激不無觸犯而雷霆

赫然之下、既以微示戒、笞而全此生矣、以一時言語文字之狂妄、而數年坎穽禁錮之凶危、則所犯之罪、與所服之法、亦足以相稱矣、今復困以桎鎖、加之以非常之法、而置之於必死之地焉、在二人一時之存亡、雖甚微、而關於天下國家者、為甚大、故憂憤感悲、盡成號呼、而嘸吾遭際之不淑、此心此情、實不能自己矣、每夜初上鎖腰、絡曰群網、曰生根、一人立而唱之、數人縛而為之、以此治元惡、寇盜之峻法、舉而加之於出百死為

宗廟社稷、慮之諫官焉、則時至此、真可為痛哭流涕者矣、况二人家貧、路遠、官淺、罪深、窮乏已極、於守獄、校卒無毫末德意、推以相及、則舉手之際、有何情分、非有二執事在上、將誰倚以存此生乎、即今幽室、寫杳、門扉晝鎖、漫漫然與長夜無以異、下地冷木之上、肌膚凜烈、一苫一席之藉、皆事屬觸法、而并為人所徹去、坐卧起立、展轉關禁、一飲一啄、率至窮詰、其萬辛萬苦、萬窘萬迫之情狀、視獄中諸犯、其嚴急之過、不啻十倍、聽其言語、察其意向、似欲二人速死、以畢事焉、耳竊以為、凡此毒苦之甚、二執事或未能以盡知焉、答曰、知之、則往年仁愛所及、固切切焉、欲全此

角山通志卷二  
殘生矣、而今復不以生處之、豈肯以數年至厚之德、轉而為一日之甚薄乎、故二人直慮以為二執事、決不知其如此之甚也、或者以一分謹慎分付、而下之人奉承之者、過於十分焉、此則事勢至此、容或有之、今日切近災禍、二人已身久罹之、天地鬼神照此衷曲、而志窮慮極、亦已甚矣、故不恤冒瀆之罪、敢以迫切悃素、仰告而無所匿、欲望此等毒罰、仍賜寬恕、但不時預備、若事出不測、則倉卒即可處辦、決不敢以餘罪有累於二執事焉、如此則情法庶幾兩盡、囚繫顛危之歲月、或可以再延矣、雖東人覘視、日在

於此、而彼皆曰二執事屬下舊人、天理之在人心者、未嘗亡、而見其知好惡、曉事理者、十常八九、更煩以一言、款喻、則若輩未有不信從者矣、若二執事不為顧念、而一聽下人之所為、則寒風凜烈之際、羸瘠弱孱之質、實難克堪、而二人相繼死者、有日矣、天地間無不死之人、無不化之物、誠使二人一旦命先朝露、倏忽殞滅、為死於諫職之下、求仁得仁、志固未嘗不自慊矣、豈以一死為惜哉、但念天王聖明、堂堂天下、不能容此致身報主之直臣、使竟死獄中、於二執事數年保全之德、愛亦未得終始領之人

解山遺稿卷二  
臣之禍朝政之損

主上盛德之累為天地間留一無窮之悲恨矣故昨嘗有詩云九天風色夜蕭蕭此日君門萬里遙不是諫臣愛一死殺身恐累聖明朝此實二人惻怛悲感惓惓不已之心也古人願為良臣不願為忠臣二人今日之事其是非得失固不容以自喙矣但慮天下後世有志士焉其慷慨殺身而存視死如歸之節者實有鑒於此焉天下後世有仁人焉其見幾而作得明哲保身之宜者亦實有鑒於此焉所見不同而好尚斯異一時心事固為人之所取而亦

為人之所戒焉若二執事身當今日之事上不使朝廷有殺諫臣之名下不使忠臣義士吞泣飲恨鬱抑於九地之下則經權迭用有善處之道存焉耳有祁大夫則叔向得以不死黨錮之禍非霍譖不能遽解而郭楫之語范滂事雖未就而高名千古不朽也二執事有賢者之節介有能者之作為故二人敢以古豪傑之事業望之而欲其成廟社之遠圖焉富貴福澤一日之榮寵名節道德萬世之瞻仰於事變難處之際而綽有處之之道非吾二執事之高出俗輩將誰望焉

嘉靖丙午春三月謝吳知府書 名孟祺同年也

陸泉公祖老先生台座下、去歲歸田里、於同州公署中、獲睹執事諭屬官語、一念惻切、常在閭里、厚下之心、可謂至矣、既抵家旬日、應酬叢冗、未及伸一言以謝、累年德愛、而天罰所及、檻車復就道矣、繫過華州道中、遇一人自言為府中使、區區瞿然下馬、恭問起居、且致惓惓慕戀意、其人已達左右矣、竊念執事以義理膏襟、經濟才畧、典此繁郡、追配先哲、如余馬輩者、必不多讓、等而上之、有雋不疑、第五倫、皆京兆舊尹、功業峻偉、光昭簡策、固已為明公之能事也、伏願厚自愛、以慰遠邇之望、鄙末以殘喘弱質、履此艱危、百死一生、旦不保夕、首陽之及、固自甘心、東陵之幸、不敢復冀、惟信步達去、隨身所到、安於僵仆、狐狸蝼蛄、一聽其來、但不知彼蒼者天、於冥冥中、何如以籌之也、小兒歸家、意必領文赴考、獲一拜候、故謹布寸衷、遙問道履、荷高明年家之情、骨肉之愛、一時紙筆不能盡述、臨楮無任仰瞻、爵頓首再拜、

上楊知府書 名守約也

尊兄楊先生台座下、往時繫過洛陽、獲接德容、繼蒙厚愛、



心切感荷、次日渡河、遇馮巡檢涇陽人、以鄉里故、設盃酌於舟中、以相送、具述執事德政、為人心所嚮服、且曰、真邵父杜母也、真邵父杜母也、區區與一二同行者、共嘆馮巡檢知言、且知高明、以君子長者之德、敷而為厚下悅民之道、有體有用、不負素履、真可嘉尚、將來責任事業、已預可知矣、小兒歸道、由治下、謹候道履、拜伸謝感、臯難中有懷耿耿、不能盡言、

### 與楊督學書

大文宗楊公祖老先生台侍下、自執事下車後、即聞凡事

從厚、有長人之度、去年區區歸田里、遇士夫相語、皆謂純以德禮化導、中心悅服、稱頌者無間於彼此、既而繫過河、南府蒙令弟先生之愛、以有借行者、未得叙談、次日渡孟津、馮巡檢涇陽人以鄉里故、置酒舟中、酌以餞送、彼歷述令

弟先生德政、且謂人皆以邵父杜母稱之、區區既嘆馮某知言、因思海內士夫兄弟登高科躋顯宦者、往往有之、求如明公兄弟、一時皆以賢聲聞者、蓋鮮矣、世有寬厚君子、百凡敷理、優裕闊大、下人有過、開誠訓誨、必不得已、而後罪之、片善寸長、愛如已出、故曰與其殺不辜、寧失不經、其心

休休其如有容則身享盛德之令名而福慶遠延於後世如吾明公者其天資學問大率類此亦有所謂嚴明君子者如古人言察見淵中之魚人之畏懼有餘而悅服不足此雖未為不可然成就終小非所以語明公也伏望益加涵養不更初志必以天下為度將來大其勲業為霖雨以澤潤斯世是愚昧所以深望於高明者也小兒將歸意必給文補考故謹述寸楮仰候道履困難中身心眩貿語言無次有容君子必能情諒若累年德愛耿耿在心者非一時筆楮所能盡也

與汪撫臺書

汪周潭公祖老先生台侍下兩接丰範適值窘迫未得款領教益十餘載相離百死暫出復就危地邂逅之際此心當何如哉小兒歸過潼關謹布謝忱并候起居厚德厚念誠非一時筆楮所可悉也明公以義理用事治化所及遠近傾慕他日誕樹勲業達諸天下愚昧倘不以狂罪死則耳濡目染或有日焉伏願厚自愛以為世道益多凶多懼之地中心藏之不能盡言

與田主簿書

大德君子田道充尊兄先生侍下自癸未年侍清教於長安書舍中當是時愚昧竊兄德範自淑者日多有之既又候會倏別至戊子秋消息不相聞者將二十年不圖於繫檻危迫凶禍不測之際得一邂逅於他鄉焉且喜且悲把袂客館傾懷款叙漏至夜分而各忘其倦則脫然於形骸尔我之外矣次日策馬遠送於數千里之外達于營蘭若中情戀戀將之以酒殺重之以贐貺洒淚流涕一行一洒每念及此中抱惻切宛若復一相見也不才於十月二十四日至京次日起更時復下獄中囚困之狀固一同於往

時但五六年間顛頓挫抑血氣漸衰精神漸減視初入獄時凡百摧折直能以身當之而畧不為難者則頗有間矣誠不能真有所見而樂天委運處以寬裕但勉強排遣於意外之加一聽其來或竄身異境以禦魑魅或填屍溝壑以恣狐狸皆不才宜有之罪夫何敢辭若幸天恩復歸田里過閱鄉城外再圖一會則千百中之一二也實不敢望小兒歸謹候起居且致謝忱意不盡申之以辭曰嗟人聚散兮有類浮萍慨今憶昔兮雙淚沾纓他鄉邂逅兮有懷盡傾君之膏次兮塵垢功名嗚呼把酒兮送行難別兮友

情字內關心兮此身匪輕臣罪當誅兮天王聖明

與原員外書

方畦年兄先生門下去秋幸獲一面不圖復有後來事數年傾慕未得盡慰潼關追魏亦以窘迫倉忙之際款陳不便草率奉復暨冬十月二十五日夜復下獄中囚繫狀一同往年或死或生皆古今人世常有之事不足多道尚記歸時途中遇周潭公輔相問勞即擊節歎賞謂兄體用該備學業淵源更非昔比想林下數年靜閱幾微熟仁精義於宇宙事比自在吞吐中矣昔者幸庵彭先生欲出則效諸

葛孔明退則效陶淵明為二公像置書屋中朝夕敬觀以自勵焉前輩尚友古人一飯不忘故事業遠過後人吾兄今日進修質之先哲同一揆也故耿光昭著朝野推重小兒近日書告與舍甥禹卿侍教下區區深自慶慰小子輩幸遊君子門下咳唾所及無非身心之益但彼資性愚鈍數年奔走已成荒廢恐無受教之地謹謝眷念爵頓首再拜

與原方畦先生書

方畦年兄侍下拜讀教翰知起居萬福困憊中亦切喜慰

西望瞻思萬里杳杳強起述此以告第不知兄之家慮何如恐不能不勞心也春秋百王不易之大法扶衰轉危見諸行事仲尼作用盡在此書兄潛心及此所志不小但井溍不食亦運數使然事自關於天下已身通塞不慮也近日得對山集讀之每切感慨蓋世之才經濟之畧真以罕見其儔傑人志士積抱負於生平者孰不欲親見其行轉斯世於隆古之盛乎然所願不遂則亦莫如何矣願兄以古人自期待進則覺一時退則傳後世禹卿望教訓勿聽廢棄

與胡知府書名汝輔

郡伯大君子胡公祖老先生大人侍下自庚子秋幸與教下寵顧寔多凶危中六七年間於厚德厚愛未嘗不在懷思去歲夏六月會高吏部始知執事有關中之行高言郡大政繁實推擇任之年来屢聞垂念心實悲感僕淹淹殘息百死之地朝不慮夕執事不忘舊好是以古人自處而僕不足以當盛愛矣伏思前輩如余司馬柴總制皆以英哲練達久典此郡明公碩德遠猷與之並駕他日功名事業彪炳宇內以霖雨蒼生者今實基於此焉僕或罪不即

死尚當有傾聽之時、伏願為宗社生靈、厚自愛、偶便謹此、遙伸謝忱、因板殘軀之上、不能布、困憊昏惑、筆札欠恭、高明知我、必不深辜、

賦

夢遊山賦

時和煦以轉泰兮、歲惟丁夫壬寅、予彷彿於夢中兮、夢歸遊於咸秦、歷韓魏之故疆兮、泛栢舟於渭濱、浮颺颺以遠覽兮、暫憇夫山之危岑、乃吳嶽之崔嵬而秀麗兮、古號曰西雍之鎮、峯突岫以峻出兮、勢若連乎霄辰、石巉巖以峻

增兮、百壑研其嶙峋、風習習以清和兮、迹迥脫於世塵、草與木森森而夭喬兮、秀雲邊其萃萼、鳥與獸踴踴而頡頏兮、若解意以相馴、予乃采芝蘭以聊茹兮、氣和煦而苾苾、把清泉以時酌兮、蕩吾夙昔之塵襟、忽回顧以寥廓兮、百峯羅翼其共臨、俯仰予長嘯而朗吟兮、高育次以樂真、山有廟焉、迤邐其麓之東南兮、以時妥侑乎嶽神、棟宇苞暈其壯固兮、丹青煥乎其惟新、背巉巖而面涇渭兮、延廣袤其幽沉、古取夫萃與渙之大義兮、儼嶽像以獨尊、予乃肅容儀以瞻拜兮、心慄祗其快覩、復長跼而祝之曰、惟明

神其監觀于下土、以大義而降禎祥、與妖孽兮、斯固無幽而不燭、夫何世事之紛紛、乃有稽典訓而不類兮、固予中心其眩、貿予敢筮游衍、而不予隱兮、願得夫子奪之微故、惟予小子之有生兮、何不辰而遭世風波、洒憂時之血忱、而貞志於乎先兮、固久罹於窞坳、時省愆而思咎兮、求不忝於屋漏、於歲月之陽春兮、今已兩過、念予總角而志學兮、每矢心以克邁、嚴步履以出戶兮、敢斯湏而或怠、景先哲以周旋、而與歸兮、忽凶害焉、其顛崇、固予小子反復思之、而莫知其謂也、語畢、悽慘流淚、潛然、偃僕伏俯、聽神所

言、惟神鞮爾、而有聲兮、復喟然其長嘆曰、嗚呼、來汝小子兮、是爾之愆、爾不聞曲其躬、而圓其行兮、取封侯以相先、或有貞直方而未少回兮、死固不免於道、邊當行而吾行之兮、當止而即止、斯先達之明訓、而可敬服兮、胡不珍身而量處道、固不能無消息兮、應斯有常、而有不苟、相幾而或少矣兮、夫孰非以災而自取、惟明哲之見高一世兮、動自遠於坎硠、燭隱機而尚肥遯兮、泛長江之一舸、乃有迷檢括而未諧兮、拂潛晦以自頤、銜崑山之良璧兮、人共惜夫楚和履、大閑而不苟措兮、固自謂世所尚也、當柄鑿之不

類而欲強置兮孰不指身心以為訛嗚呼小子而今後其  
尚亶亶焉以克勵未可以一魔而遽挫思福堂之玉汝於  
成兮方一念之偏頗惟古良士之堅志於患難兮日尚友  
以切磋寧雉介之耿於羅網兮勿狡兔其爰爰寧松栢挺  
挺於歲寒兮勿桃李其灼灼何所往而非吾可安之地兮  
慎無怵中而懷憂彼皇矣之全賦於有生之初兮惟反身  
而是求聽吾誨爾之諄諄兮尚不忝於前修苟迷途其終  
不悟兮乃脂膏以自羞予乃再拜稽首而起應嚙嚙其未  
已將周旋以出戶忽驚愕以覺見悟時東方之既晨愧絲粟

於枕衾嗚呼天耶神耶教戒懇切誠可信而可遵大道坦  
坦而無曲兮固不越乎吾之心

惻惻行送王大尹出獄

惻惻送君幽繫裏天涯回首如千里此歸何以佑斯民直  
須德化平如水最憐愚昧與飢寒古今失所皆由此受托  
宜思君父恩同類孰非吾赤子君不見蒲鞭一段好生心  
天地萬物真同體

古栢行送王子言

雨秀金吾古栢叢老枝猶解起南風乾坤留眼吾看栢看



時聊與子言同看栢豈惟憂自崇看栢還增恨無窮獨不見去冬飛雪滿長空宇內應無桃李紅偶從挺挺寒栢下與爾送出平定公

平定公子  
言同鄉

### 山西行

吾聞往歲旱魃災赫赫炎暑毒埏垓壠上禾苗盡枯稿茫茫千里赤塵埃疾威均為下土虐山西之民尤可哀閭里餓莩無所告昊天又降酷烈來草茂秋高虜勢張胡馬南侵混疆場可憐百萬生靈命盡在虜人刀下亡太原城外數千里血流漂杵遍封疆死者縱橫如山積守臣不敢奏

朝堂殺氣騰空鬼神愁尸填溝壑水不流舊時邑落數千室而今且無二三留醜虜變謫不可測邊將何不早為籌在廟謀坐筭要得良平策經畧須用韓范儔夷狄世為中國患古來誰不事先憂君不見薄伐玁狁勵士馬周王允是中興者當時文武有尹公舉旗一麾清郊野又不見漢帝當年重細柳亞夫軍前無躑躅拊髀思賢一飯切魏尚復作雲中守天王我皇聖且仁區區周漢豈作倫常慮一物或失所豈知虜禍瀆蒼旻我願君王目視遠燭沕穆望見山西境上多白骨我願君王耳聰聽幾萬里時聞山西

角山遺稿卷二  
哭聲夜不止

書白樓詩卷 趙總兵號也

將軍之居近白樓將軍之才冠帝州膏中自有兵百萬曾  
出將府舒國憂而今夕作園中客邊塞孰為胡兒愁一到  
囹圄八九月手執周易誦不輟將軍本是儒者流於此可  
以觀志節雲鳥往時成八陣韋編此地慕三絕每向憂中  
尋樂處魯史周文日講說談文論武擬虛舟我識將軍豪  
興優身雖凝坐一室間心在羲皇境上遊嗟予真機久未  
開狂惑速禍自天來還幸此日成良晤彷彿樂趣散愁懷

世上紛紛苦幽滯困亨誰解昔人意幾時各得歸山林毋  
忘爾我自相遇

歌

七歌

有手有手手段拙弄得人世紛如雪未宜醒執名利板但  
可醉撈秋江月忽忽百年成甚事微微一息久將絕嗚呼  
一歌兮為爾憐要撥雲霧轉晴天

有脚有脚脚步錯錯走當年塵世道崎嶇多是倒人坑一  
蹙反為魑魅笑未死還餘憂世夢有生堪類霜前草嗚呼

再歌兮歌正壯、蹈入冥海千層浪、

有耳從來不聽人說、宜西我却東、萬方愁苦聲堪痛、收  
入無底雙窾中、迅雷不顧額前震、身禍飄如輪後風、嗚呼  
三歌兮歌愈悲、傾聽莫為利口移、

有目閑將一世愁、聚來都放在眉頭、肉眶不見羊腸險、血  
淚可增江海流、我思哲人瞻萬里、乾坤顧盼在雙眸、嗚呼  
四歌兮歌意頻要識、人間假與真、

有身形弗七尺長、地維天柱要擔當、幾年餓成空皮骨、扶  
杖出門欲仆僵、外混塵埃羅羅網、內抱赤心與忠腸、嗚呼  
五歌兮歌迫切、洒盡天涯一腔血、

有子有姪未成立、音書問我我惻戚、跋涉往來六七年、千  
山萬山日灑泣、讀書耕稼總難為、思量到此喘噓吸、嗚呼  
六歌兮歌未闌、父死誰憐汝飢寒、

有甥生年為我勞、往時見我便長號、汝母今年將半百、骨  
肉屬我父母毛、兄弟往來無了日、令我憂中思爾曹、嗚呼  
七歌兮心未已、收我殘骸歸故里、

丙午年首夏、患足疾、六月淫雨大作、獄屋中水深二  
尺許、囚板漂沒六七日、始退重此濕感、不能步履、今

一載矣殊覺衰憊恐倏殞滅為十招魂以自慰卧起  
慷慨援筆立就詞固不能盡工也丁未年四月二十

五日作

兩足屈纒雙目眩暗身孱罪長影形相伴百憂時觸五內  
悽慘耿耿筑筑夜以達旦生理幾何魂將我散嗚呼魂兮  
魂兮宜莫即散我

皇聰悟當有渙汗

愚慮參差成此幽困綿綿赤抱皤皤白頭過隙野馬涉世  
浮漚狂迂速罪予復何尤魂欲我去飄忽遠逝嗚呼魂兮

魂兮爾無省蕩骨肉萬里涕泣我望

我生不辰長夜轉戚悠悠蒼天燁燁白日沈瀼瀼漫乾坤

穆沕哭者既死嘆者為失旅魂杳杳十喪六七嗚呼魂兮

魂兮哀職爾補少延須臾孰無肺腑

陰風瑟瑟旅燕唧唧暮雨朝雲胡為我急身世窮年天涯

一息寧為醜骷羞作鬼蜮我生為勞魂欲放逸嗚呼魂兮

魂兮慎爾先發與我相須受天之罰

百感摧剝寸衷消毀長昊黃靈滿腔赤淚有覺殘生無涯

譴崇發發回風滔滔逝水魂如不來伊誰為類嗚呼魂兮

角山遺稿卷三  
魂兮乎我以心人生遭際徃古來今

半百生涯一軀殘軀孤抱憂勞萍踪屯蹇萬死交戚九天  
玄遠倏寐長思流光空轉魂欲幾何灼灼微燄嗚呼魂兮  
魂兮何遽舍我我欲爾盡散無不可

人生幾何吾豈戀戀成吾一死反貽國患歲序屢遷久甘  
幽難使我

君王不殺忠諫魂何徬徨去如飛翰嗚呼魂兮魂兮孰非  
天命於此永依安土以聽

風塵遂邇薄暮茫茫此際勞人孰不永傷悲萬里天斷九

迴腸誰乘危機憂我

君王我魂寥落便欲長往嗚呼魂兮魂兮努力炯炯人謀  
既藏天步可永

自我復來寒暑更度日月信速轉看白首我思故人伊誰  
可友履義安仁身類塵土死也生也彼亦何有嗚呼魂兮  
魂兮吾何爾號恐將一死輕於鴻毛

男兒脚步自有圓方由我顛躓之死何妨履我后土戴我  
穹蒼省我之愆是我之狂魂如解此安我福堂嗚呼魂兮  
魂兮聊此相將待我罪終任爾飄揚

古詩

四言古詩

颺颺西風悠悠危困霧掩長空懷此憂歎我生尚存我心  
難忍告爾君子不可不慎天方威降無滋幽釁

颺颺西風悠悠危困我生不辰遭此難屯告爾君子胡不  
自盡拯溺救焚伊誰之人天方降威無為顛震

颺颺西風悠悠危困自昔以來貽我愁懣告爾君子各宜  
履順誤國之謀伐國之刃天禍方殷無惜憂瘥

颺颺西風悠悠危困我心日憂我淚日披蒼天蒼天胡降

阮運謀猷乖離而日以甚抱此赤心徒爾諄諄

何以圖之周道惟近騏驥惟良莫耶非鈍聽無不聰視無  
或瞬各欲事天豈敢相迫我為爾謀爾無不信

五言古風

志士輕天下不類世人情由来守之固出自見之明時哉  
誠可尚古今不易真緬懷千載上愧此魯連生存趙片言  
重却秦天下驚脚跟高蹈處無陂總是平

次杜少陵韻答人

殘息悠悠在真成一懦夫當年何所為心欲見唐虞世運

豈翻覆人為自險夷好生與惡死此念膏中無

采葵

幽中惜歲月日暮采園葵采之何所用欲以贈相知相知相去遠道路多阻蹇安得藉晨風萬里寄誠懇

四丁寧贈錢員外緒山

留心剪枝葉枝葉更穠鮮努力勤于耒共耕方寸田吉人常默默浮士好便便覺彼高騰處久將真意捧昊天但覆幬四運自周旋孔聖無言教真機向此傳丁寧一告語告以聖同天

結交結君子茅茹自相連媚月增心癖孰能示我愆相同即是聖異處且為賢以此求斯道恐成狹且偏心能樂取善善自我心全舍已從人處襟懷何大焉丁寧再告語無我自天然

迂儒多曲語壯士自平夷千古周行在胡為向小岐荆榛不自剪令我此心迷洞識虛明體超然即在此性分同一理此理最淵微孔聖言仁處力行不遠而丁寧三告語相與憶所之

尚友希前哲無勞辯淺深開言動喋喋矛戟已森森祇覺

角山遺稿卷一  
甯懷隘、恐非畜德心、古人各有見、原本自相忱、豈若異流者、馳騁多詖淫、何苦但永失、宜從得處尋、丁寧四告語、共嚴此心箴、

贈人

先生藏遠趨、微原欲探討、仁風秀群英、禮化淑懷抱、講堂逍遙處、相與篤皇道、芹宮滋松華、泮池潤瑤草、瑤草日日長、松華歲歲好、君子尚采采、衿佩以為寶、

哭姜郎中義泉二首 姜號義泉名時和

前日哭尚書、今日哭郎中、大夫相繼死、應時命之窮、但擬

同出險、豈堪忽告終、將吾一掬淚、頻洒與西風、  
吾痛翟司馬、又哭姜義泉、人生值變故、與世自相關、義泉死今日、司馬肉未寒、義泉瘞今日、司馬殯未乾、桎梏非自取、幾微隱禍端、悠悠天地裏、展轉屬艱難、

五言律詩

雜韻五言律四首

鴈羽衝雲去、燕山春意濃、孤踪一路險、衰髮兩邊蓬、戢步緣新綠、依隈挹暖風、將吾眼底事、都付不言中、  
地隱春遲到、幽懷更耐看、鴈聲愁遠塞、雲影滯餘寒、斗笠



營秦隴、絲綸坐渭竿、而今耕釣手、桔槔亦相安、  
我心誠匪鑒、遺恨在雲壤、豈但身憂切、更餘國慮長、九重  
終自悟、一飯亦難忘、只恐建炎詔、徒憐陳少陽、  
身危非所恤、多罪累君王、萬古綱常理、一軀忠義腸、青天  
掩長霧、白日下繁霜、兒女此時淚、未知為國傷、

卽事三首

百年吾宇宙、萬里此相逢、阨險情由適、經綸志復同、隙風  
動颺颺、窓月照彤彤、對榻閑談後、悠然世慮空、  
衰危親杖履、步履轉徬徨、地作臨池濕、天從入夜涼、清颺

輕燕室、雲影暗幽窓、孤念蕭蕭在、閑同歲月長、  
結髮交遊好、同舟涉渭濱、壯懷今若此、老淚更堪頻、險地  
忙為苦、長天去是真、知從大夢裏、自了百年身、

獄中慰章秀才

萬事總由命、宜須安受之、但求一念是、莫嘆百憂罹、窘迫  
置自處、將來做廣居、樂天境界上、得到是男兒、

有報周磧山先生家慮於獄中者痛而作此

一朝君卽死、七載我猶生、祇墮萬人淚、空留百世名、乾坤  
藏正氣、日月照精誠、展輓思餘喘、真如草芥輕、

勉仕男讀書二首

長路頻來往、空將歲月虛。百為超俗慮、一步到天初。只使  
心無蠹、何須食有魚。燕山二尺屋、可讀五車書。戰國策馮驩  
自嘆食無魚  
憂國吾遭難、思親汝復來。青天何易蔽、赤霧總難開。萬里  
燕秦路、千尋柝棘臺。要知百死地、不是一身災。

有感二首

燕語遺牕外、薰風入卧邊。真懷死難易、歲序幾經遷。險步  
終成躓、雙毛半已顛。獨憐憂世念、空向九重懸。

期親堂上老、遊子淚潛然。假寐驚還起、餘生死復延。脚跟

總實地、屋隙是晴天。骨肉心難過、百慮日相牽。

有感六首

老去心猶壯、詩成一洒然。襟懷羞縷縷、風景嘆年年。竚立  
凶危地、出王日夜天。死亡誠旦暮、終不受人憐。

憶昔躬耕日、蓬廬夢九州。握珠雖易出、按劍總難投。草芥  
生猶在、君王尚遠謀。古來殺諫士、誰可免多憂。

好景隨時在、幽人心自如。難將當世事、得免動相殊。總是  
更新念、還能展舊書。古人心已逝、誰共嘆憂虞。

夜雨急聲住、牕風更覺新。獨憐幽景暮、空抱此心真。跬步

萬方足經年百死身、每憂深罪裏、無以答蒼旻、  
庭院幽、沉處黃鸝聲、自和炎風侵夏木、世道轉頽波、夙志  
逢時、徒韶光、雙鬢皤、如何人世上、獨我憂心多、  
有時樂興至、觸目更憂來、時覺寸心鬱、未能盡日開、人謀  
尚消息、天意自安排、將此百年志、空餘萬慮灰、  
庭柯鳴歲月、又是一翻新、憂世總宜獄、感時却憶秦、早梅  
乘暮雨、佳木秀溪濱、茅屋遠塵跡、空懸老此身、

送忽百行

忽生遙以慰、五日是歸期、倚劔無歧路、佇雲有舊思、自吾  
蒙困難於子始、真知人世關情處、難為此別離、

遣仕男歸家

骨肉分離久、殷憂切寸忱、兒無膝下苦、父有坎中深、顧此  
五年困、皆吾三代心、一升與一降、物運此相尋、

謝信官

患難人多畏、信郎獨不疑、再從牌上寫、曩在手中提、每日  
多君厚、經年濟我飢、老夫窮困裏、報汝一聯詩、

懷友三首

園中春早到含淚送心知何處相思切歸來獨坐時詩書  
還有分患難總無期俛仰千年事哲人若在茲  
相逢在縲紲歲序兩推移論難思洪古宵懷各洞披朝朝  
同暮暮切切與惻惻音容今萬里西望日嗟咨  
憂時同講道發興共聯詩而我相逢久真為人世奇窮通  
忘苦樂聚散有歡悲無柰此心切長歌衍浩思

送尹商衡都黃門出獄二首尹名為相吏科給事中

數月同幽難一朝慨別離送行無喜色居險有憂思好結  
詩書伴不為貧賤移山林吾素志應筮丈夫需商衡獄中筮  
得損之需

需極乘時起文明及早開經畫小自用功業大朋來氣運  
機方動人謀預可回兩肩剛骨上擔子是三才

哭翟尚書司馬二首翟號聯峯名鸞

昨夕云長別今晨餘土丘身士及此地國步為分憂一品  
息猶在百年事已休園階遙拜下雙淚不能收

人世誰無死哭君吾倍傷大臣屬手足司馬近廉堂豈意  
履危險錯思銘太常屍留獄戶外殘蘂蔽斜陽時暑甚以公  
藉薦掩之

送人出獄

昨暮動相問今朝柰子何別懷增慷慨回首欲滂沱一隙

蒼天在百年憂境多、共憐宇宙內、世道類江河、  
書聯翁病中屬言後

最可傷心處、身危及汗園、青天臨潞水、白日照燕山、各有  
夷險路、誰無生死關、老翁書片紙、流淚不能看、

雜作二首

悠悠蒙大難、歲月總無涯、憂世多君慮、好音向我懷、浩然  
揮翰思儼若、定心齋、三接咸亨泰、拜舞近天堦、  
鷗鵬離楚水、舒翼到燕臺、世道同文運、金吾久已開、寵從  
天上降、人是非常才、還喜新榮後、恩光次第來、

謝人餽桃

念此幽囚久、相逢獨見真、論心許忠孝、於義多君臣、良士  
輕聲譽、哲人重保身、投桃知子厚、報李愧予貧、

贈姜義泉一首、義泉未病時、自謂將終事、出獄索詩  
以贈之、過數日、病二十日、即死命也、

十年交與後、此地復相逢、安土心猶在、匡時志已窮、君當  
耕蜀下、吾欲死獄中、樂道捐軀處、無言跡未同、

書卷初有中風言後

揚聲下吾為玉樹中樂直能雖與無言抑未同  
十子交與此此此此此此此此此此此此此此此此  
必觀之過幾日燕二十日何天命也

韻美嘉泉一首嘉泉未流却自隨外然事出難索

舞養譽替入重尉良好琳吹千草輝李顯于貧

念此幽囚又財全圖長其備心情忠奉公嘉多喜到身士

機人贈詩

進喜前案後思九火

